



IROMAG

Odlazni studenti



U OVOM BROJU

POČETAK GODINE NA UNIVERZITETU

**ERASMUS+ PREZENTACIJA -
NASTAVNIČKI FAKULTET**

**PENOLOGIJA U
PRAKSI**

**MOSTAR KROZ OČI
STUDENATA TURIZMA**

**BRONZA IZ CASABLANCE
ZA MOSTAR**

**ISKUSTVA STUDENATA:
SANINA, LEJLA & ESMA**

by IROUNMO

Početak nove godine na Univerzitetu Džemal Bijedić u Mostaru obilježen je osvrtom na vrijednosti koje su nas pratile i na samom kraju prethodne godine – zajedništvo, solidarnost i brigu za druge. Januar je donio mirniji tempo nakon praznika, ali i priliku da se prisjetimo lijepih inicijativa koje su na najbolji način zaokružile 2025. godinu.

Među njima se posebno izdvaja humanitarna kampanja podjele novogodišnjih paketića djeci bez roditeljskog staranja, koju je u decembru organizovala i realizovala Unija studenata Univerziteta Džemal Bijedić u Mostaru.

Januarsku atmosferu dodatno je obilježio rijedak zimski prizor – snijeg u Mostaru. Nakon mnogo godina, grad je početkom godine zabijelio, unoseći poseban ugođaj u prve dane januara. Snježni pejzaži, kratka zimska zatišja i povratak svakodnevnim obavezama obilježili su početak novog semestra i nove godine.

Univerzitet Džemal Bijedić u Mostaru nastavlja svoju misiju stvaranja otvorenog, inkluzivnog i međunarodno orijentisanog akademskog okruženja, s ciljem da i u 2026. godini bude prostor znanja, saradnje i zajedničkog rasta.

ERASMUS+ PREZENTACIJA - NASTAVNIČKI FAKULTET

By IROUNMO

Na Nastavničkom fakultetu Univerziteta Džemal Bijedić u Mostaru, 7. januara 2026. godine, održana je informativna prezentacija o Erasmus+ programima razmjene, s ciljem upoznavanja studenata s mogućnostima međunarodne mobilnosti i sticanja akademskih i profesionalnih iskustava u inostranstvu.

Prezentacija je realizovana u saradnji s prorektorom za međunarodnu saradnju prof. dr. Rijadom Novakovićem, asistentom Amelom Jazvinom, prof. dr. Esvedom Kajtažom i prof. dr. Denisom Vukom. U prezentaciji su učestvovali studenti Odsjeka za sport i zdravlje, kao i studenti Studija dizajna interijera.

Studentima su predstavljene osnovne informacije o Erasmus+ mobilnostima, uslovima i procedurama prijave, kao i praktični savjeti vezani za učešće u programima razmjene.



PENOLOGIJA U PRAKSI

By IROUNMO

Dana 12.1.2026. godine studenti 4. godine Općeg smjera i studenti 3. godine studijskog programa Kriminologija i sigurnosne studije, u pratnji prof. dr. Denisa Pajića, u okviru izučavanja nastavnog predmeta Penologija, posjetili su Kazneno popravni zavod poluotvorenog tipa Mostar.

Tokom posjete studenti su imali priliku razgovarati sa uposlenicima Zavoda, koji su ih upoznali sa zavodskim tretmanom osuđenika i osnovnim sigurnosnim protokolima, rehabilitacijskim programima i izazovima koji se javljaju u procesu resocijalizacije.

Ova edukativna posjeta omogućila je studentima bolji uvid u praktični rad i funkcionisanje Zavoda, kao i razumijevanje njegove značajne uloge u društvu.



MOSTAR KROZ OČI STUDENATA TURIZMA

By IROUNMO

Studenti druge godine Turizma, Suana Brkić, Asja Bačić i Mak Hadžić, u okviru predmeta Marketing izradili su promotivni video koji stavlja fokus na tradicionalni kafić Lasta i ambijent Starog grada.

Video prati studente tokom šetnje preko Starog mosta i posjete kafiću Lasta, gdje kroz ispijanje bosanske kafe i degustaciju tradicionalnih bosanskohercegovačkih slastica otkrivaju ljepotu Mostara.

Kroz ovu kampanju studenti su istakli tradiciju, autentičnost i gostoprimstvo Mostara i Hercegovine.





BRONZA IZ CASABLANCE ZA MOSTAR

By IROUNMO

Student Nastavničkog fakulteta Univerziteta „Džemal Bijedić“ u Mostaru, Odsjeka za sport i zdravlje, Mustafa Hebib, ostvario je izvanredan sportski uspjeh na međunarodnoj sceni osvojivši bronzanu medalju na Svjetskom kupu „Casablanca Open“, održanom u Maroku.

Kao reprezentativac Bosne i Hercegovine u džudu, Mustafa je u izuzetno jakoj konkurenciji pokazao visok nivo tehničke spremnosti, discipline i sportskog duha, te zasluženno osvojio medalju u kategoriji do 81 kg. Njegov rezultat predstavlja ne samo lični uspjeh, već i značajnu promociju Univerziteta i Bosne i Hercegovine na međunarodnom sportskom planu.

Ovaj uspjeh potvrđuje važnost povezivanja akademskog obrazovanja i sporta, kao i predanost naših studenata izvrsnosti, kako u nastavnom, tako i u profesionalnom i takmičarskom okruženju.



ISKUSTVA STUDENATA: SANINA, LEJLA & ESMA

By IROUNMO

Studentice završne godine Studija turizma, Sanina, Lejla i Esma, realizovale su projekat u sklopu predmeta Projektni menadžment pod nazivom Feel Bosnian Beauty, te su sada podijelile svoja iskustva u nastavku.

Rad na projektu u okviru predmeta Projektni menadžment u turizmu predstavljao je jedno od najznačajnijih i najinspirativnijih iskustava tokom našeg studiranja. Kroz praktičan rad imale smo priliku primijeniti teorijska znanja, razvijati timski duh, kreativnost i organizacijske vještine, ali i osjetiti kako izgleda stvarni proces osmišljavanja i realizacije turističkog projekta. Ovaj predmet nam je posebno pomogao da shvatimo važnost planiranja, odgovornosti i profesionalne komunikacije u turizmu. Studiranje na Studiju turizma pružilo nam je široko i kvalitetno obrazovanje koje povezuje teoriju i praksu. Kroz različite predmete stekle smo znanja iz oblasti turizma, menadžmenta, marketinga, kulturne i prirodne baštine, što nam je omogućilo da sagledamo turizam kao složen i dinamičan sistem. Posebno bismo istakle podršku profesora i asistenata koji su nas motivirali da razmišljamo kritički, samostalno i inovativno. Studij nam je pružio brojne mogućnosti, od rada na projektima, prezentacija i timskih zadataka, do razvijanja javnog nastupa i samopouzdanja. Imale smo priliku učiti kako predstaviti destinaciju, osmisлити turistički proizvod i prilagoditi ga savremenim trendovima, što smatramo izuzetno vrijednim za naš budući profesionalni put. Kao studentice završne godine, na studiranje na Univerzitetu gledamo s velikim zadovoljstvom i zahvalnošću. Univerzitet nam je pružio okruženje u kojem smo rasle ne samo akademski, već i lično. Stekle smo prijateljstva, iskustva i znanja koja će nam biti temelj za dalje usavršavanje i karijeru u turizmu. Budućim studentima, kao i srednjoškolcima koji razmišljaju o upisu Studija turizma, poručujemo da budu aktivni, radoznali i ambiciozni. Studij nudi mnogo, ali je važno iskoristiti svaku priliku, biti otvoren za nove ideje i ne bojati se izazova. Turizam je oblast puna mogućnosti, a uz trud, kreativnost i posvećenost, ovaj studij može biti odličan početak uspješne profesionalne priče.



IROMAG



/iro.unmo



@iro.unmo



/iro.unmo

IROMAG TEAM
MIRSADA BEHRAM
LEJLA ŠKALJIĆ
AMILA VRTIĆ

